

## PAWL IH CAPAT EFISA

*Hae capat loe Pawl mah tarik (1.1; 3.1). Kolosa capat tarik pacoengah hae capat hae tarik kalang mue, tiah poekhaih tawnh o. Pawl loe Rome vangpui ah saning hnetto thung thongkrak, thongim thung hoiah ni hae ca hae tarik (3.1, 6.20). Tarikhaih saning loe (A.D 60-62) thuemtham kalang mue, tiah tanghaih tawnh o. Asia prae ah kaom Judah hoi Gentel kricaanawkw salakah lok angaekhaih oh pongah, kricaabu hnetto ah ampraek o, to tiah ampraekhaih mah palung amhonghaih amrosak tih, tiah Pawl mah hnuk pongah, hae ca hae tarik pae. Pawl mah Gentelnawkw khaeah tamthanglok hoih taphong o tih (1.10; 3.8-9), tiah thuih. To tiah lok taphonghaih loe dungzan Sithaw atimhaih ah oh moe, vaihi Kri ah amtueng boeh, tiah a thuih. Gentelnawkw loe canghniah Sithaw lokkamhaih thung hoi angvin ah oh o, toe vaihi loe Sithaw prae kami ah oh o boeh (2.12-19), tiah thuih. Kri rang hoiah Sithaw mah kricaabu hnetto to maeto ah tacuu boeh, to pongah kricaanawkw mah poekhaih maeto ah amhong o thai hanah, tha pathok han angaih, tiah a thuih. Kricaabunawkw loe Kri ah maeto ni (4.3-4), tiah tarik.*

<sup>1</sup> Sithaw koehhaih rang hoiah Jesu Kri mah patoeh ih kami, Pawl mah, Efisa vangpui ah kaom kaciim kaminawkw hoi Kri Jesu ah oepthok

kaminawk khaeah ca tarik: <sup>2</sup> Angraeng Jesu Kri, aicae Ampa Sithaw khae hoiah tahmenhaih hoi monghaih nangcae khaeah om nasoe.

*Kri ah Muithla tahamhoihhaih*

<sup>3</sup> Kri rang hoiah van prae Muithla tahamhoihaih aicae han kapaek Sithaw hoi aicae Angraeng Jesu Kri ampa khaeah tahamhoihaih om nasoe, <sup>4</sup> amlunghaih rang hoiah Sithaw hmaa ah ciimcai moe, coek koi kaom ai ah a oh o thai hanah, aicae loe Anih mah long om ai naah Kri ah qoih boeh, <sup>5</sup> a koehhaih baktih toengah, Jesu Kri rang hoiah Angmah khaeah a caa ah ohsak hanah, aicae kawng to canghnii hoiah a thuih coek boeh, <sup>6</sup> A tahmenhaih hoi lensawkhaih pakoeh hanah, palung ih a Capa rang hoiah aicae to talawk boeh. <sup>7</sup> Kathuk a tahmenhaih baktih toengah, anih ih athii rang hoiah angmah ah akranghaih hoi zae tahmenhaih to a hnuk o; <sup>8</sup> A tahmenhaih, palunghahaih hoi panoekhaihnawk to paawt ai ah aicae nuihah a kraihi boih. <sup>9</sup> A koehhaih hoi angmah ah khokhanhaih baktih toengah, kathuk angmah ih atimhaih to aicae hanah amtuengsak boeh: <sup>10</sup> dung kroekhaih akoep naah, Anih mah van ih hmuen hoi long ih hmuennawk boih, Kri ah maeto omsak tih: <sup>11</sup> hmuennawk boih a koehhaih baktiah sahkung loe, atimhaih a tawnh baktih toengah, aicae loe anih rang hoiah qawk a hnuk o boeh, tiah canghnii hoiah a thuihcoek boeh. <sup>12</sup> Kri ah oephaih tawn hmaloe aicae loe a lensawkhaih pakoeh kami ah a om o tih. <sup>13</sup> Loktang lok ah kaom, nangcae pahlonghaih kahoih tamthanglok na thaih o pacoengah ni,

nangcae mah doeh anih tanghaih to na tawnh o: anih to na tang o boeh pongah, nangcae loe lokkamhaih kacai Muithla hoiah catui daeng boeh, <sup>14</sup> A lensawkhaih pakoe hanah, lokkam ih Kacai Muithla loe, a qan ih hmuen akranghaih pha ai karoek to, aicae qawktoephaih caksakung ah oh.

*Thoemhaih hnuk hanah lawkthuihah*

<sup>15</sup> To pongah Angraeng Jesu tanghaih rang hoiah kaciim kaminawk boih na palung o ti, tiah ka thaih naah, <sup>16</sup> nangcae han boeng ai ah kawnhaih lawk ka thuih, nangcae han lawkthuih ka pahnet ai. <sup>17</sup> Aicae Angraeng Jesu Kri ih Sithaw, lensawk Ampa mah, anih panoekhaih hoi palunghahaih muithla ang paek o thai hanah, lawk ka thuih: <sup>18</sup> oep kaom anih kawkhaih to na panoek o thaih han, nangcae ih palung mik aangsak moe, kaciim kaminawk mah toep han ih lensawk qawk to na panoek o thai han hoi, <sup>19</sup> kalen a thacakhaih hoiah toksak baktih toengah, aicae tangcaanawk khaeah kalen parai a thacakhaih amtuengsak hanah, <sup>20</sup> to thacakhaih mah Kri ah toksak naah, Anih to duekhaih thung hoiah pathawk moe, Anih to van prae ah Angmah ih bantang bangah anghnutsak: <sup>21</sup> Anih loe hmuennawk boih ranui ah angraenghaih, akaa tawnhah, thacakhaih hoi ukhah to tawnh, hae long nuiah khue ai, angzo han koi long ah doeh ahmin paek ih ahminnawk boih ranui ah oh, <sup>22</sup> hmuennawk boih a khok tlim ah a suek moe, kricaabu boih ih lu ah ohhah to

anah khaeah paek boeh, <sup>23</sup> to kricaabu loe tih boih boih, hmuennawkw boih hoiah kakoi anah akoephaih angmah ih takpum ah oh.

## 2

### *Kangtha Kri hinghah*

<sup>1</sup> Nangcae sakpazaehaih hoi zaehaih thungah na duek o naah anah mah ang pathawkw o; <sup>2</sup> canghniah loe hae long atawkw baktih, takhi ukkung angraeng koehhah baktiah na oh o, to muithla loe vaihi doeh lok tahngai ai kaminawkw khaeah toksak: <sup>3</sup> canghniah loe aicae boih doeh tang ai kaminawkw salakah taksa koehhah baktiah a sak o toeng, taksa hoi palung mah koeh ih baktih toengah a sak o; kalah kaminawkw baktiah, aicae doeh taksa ah palungphuihah katongh kami ah a oh o. <sup>4</sup> Toe palungnathaih hoiah kakoi, Sithaw mah kathuk parai angmah ih amlunghaih hoiah aicae to palung pongah, <sup>5</sup> zae thungah a duek o naah, Kri hoi nawnto aicae to hingsak let boeh, (tahmenhah rang hoiah ni pahlong ah na oh o;) <sup>6</sup> Anih mah aicae nawnto pathawkw moe, Kri Jesu rang hoiah van ahmuen ah aicae han anghnuthaih ahmuen to paek boeh. <sup>7</sup> Anih mah Kri Jesu rang hoiah angzo han koi adung ah, a palungnathaih hoi kathuk parai tahmenhah to amtuengsak tih. <sup>8</sup> Nangcae loe tahmen pongah, tanghah rang hoiah, pahlong ah na oh o; nangmacae koehah hak ih na ai ni: Sithaw ih tangqum ni: <sup>9</sup> toksakhah rang hoiah hak ih na ai ni, to tiah nahaeloe mi kawbaktih

doeh amoek han om ai. <sup>10</sup> Hmuen kahoih a sak o thai hanah, Kri Jesu ah sak ih kami ah a oh o moe, a ban thung hoi tacawt kami ah a oh o, to baktih kahoih hmuen thungah a caeh o thai hanah, Sithaw mah paroep coek boeh.

### *Sithaw imthung*

<sup>11</sup> To pongah nangcae loe canghniah taksa ah Gentel kami ah na oh o, taksa ah ban hoi tangzat hin aat kaminawk mah, tangzat hin aat ai kami, tiah ang kawc o ih lok to poek oh; <sup>12</sup> to nathuem ah Kri na tawn o ai vop, Israel kaminawk khaeah angvin ah na oh o pongah, lokkamhaih thungah kaom lokmaihih thung hoiah doeh angvin ah na oh o; long nuiah Sithaw tawn ai ah na oh o moe, oephaih tawn ai kami ah na oh o: <sup>13</sup> canghniah kangthla ah kaom nangcae loe vaihi Kri ih athii rang hoiah Kri Jesu ah kanghnai ah na oh o boeh. <sup>14</sup> Anih loe aicae misa angdaehhaih ah oh, aicae salakah kaom pakaa ih tapang to phraek moe, hnetto to maeto ah a sak boeh; <sup>15</sup> a taksa ah misa ah kaom, toksak han kangaih kaalok hoi atawknawc to a phraek; Angmah ah acaeng hnetto to kangtha acaeng maeto ah a sak, to tiah misa angdaehhaih to a sak; <sup>16</sup> thinglam rang hoiah acaeng hnetto to takpum maeto ah a sak, Sithaw khaeah to tiah angdaehhaih to a sak hmaek moe, misa ah ohhaih to a dueksak: <sup>17</sup> Anih loe kangthla ah kaom nangcae khae hoi kazoi ah kaom kaminawc khaeah angzoh moe, angdaehhaih tamthanglok to thuih. <sup>18</sup> Anih rang hoiah aihnik loe Muithla maeto ah Ampa

khæe akun thaihah a tawn hoi. <sup>19</sup> To pongah nangcae loe vaihi acaeng kalah kami hoi angvin ah na om o ai boeh, prae kami hoi kaciim kami, Sithaw imthungah kaom kami ah ni na oh o boeh; <sup>20</sup> nangcae loe patoeh ih kaminawkw hoi tahmaanawkw nuih sak ih im ah ni na oh o boeh, Jesu Kri angmah loe im takii ah tling ih kalen koek thlung ah oh, <sup>21</sup> im boih thlung hoi nawnto peh moe, Angraeng ah qoeng tahang pongah, kacai tempul maeto ah oh: <sup>22</sup> Muithla ah kaom Sithaw ohhah ahmuen ah oh thai hanah, nangcae doeh kaicae hoi nawnto im to na sak o toeng.

### 3

#### *Gentelnawkw khæeah Pawl patoehhah*

<sup>1</sup> Hæe pongah ni kai Pawl mah nangcae Gentelnawkw hanah Kri Jesu ih thongim krah kami ah ka oh, <sup>2</sup> nangcae atho oh thai hanah kai khæeah paek ih Sithaw tahmenhah to na thaih o boeh: <sup>3</sup> to tamqulok loe hnuksakhah hoiah Anih mah kai khæeah amtuengsak; (canghniah ca setta kang tarik o baktih toengah, <sup>4</sup> to ca to na kroek o naah, Kri ih tamqulok ka panoekhah to na thaih o kop tih,) <sup>5</sup> to tamqulok loe canghnii dung ih kami capanawkw khæeah amtuengsak ai, toe Muithla rang hoiah angmah patoeh ih kaciim kaminawkw hoi tahmaanawkw khæeah vaihi amtuengsak boeh; <sup>6</sup> Gentelnawkw loe qawktoep ampui, takpum maeto ah om o ueloe, kahoih tamthanglok rang hoiah Kri ah a lokkamhah thungah kathum kami ah om o tih. <sup>7</sup> Thacak

a toksakhaih rang hoiah kai khaeah paek ih Sithaw tahmenhaih tangqum baktih toengah ni, toksah kami maeto ah ka oh. <sup>8</sup> Gentel kaminawk khaeah pakrong laek thai ai Kri angraenghaih ka thuih thai hanah, kaciim kaminawk boih thungah kathoeng koek, kai khaeah hae tahmenhaih hae ang paek; <sup>9</sup> to pacoengah Jesu Kri rang hoiah hmuennawk boih sahkung, long amtong tangsuek nathuem hoi Sithaw ah hawk ih hae kathuk toksak atimhaih hae kaminawk boih mah panoek o moe, <sup>10</sup> van ukkung angraeng hoi akaa tawn kaminawk mah doeh kricaabu rang hoiah Sithaw palunghahaih hoi sak atimhaih to vaihi panoek o thai hanah, to tahmenhaih to kai khaeah ang paek, <sup>11</sup> dungzan sak atimhaih a tawnh baktih toengah, to sak atimhaih to anih mah aicae Angraeng Kri Jesu rang hoiah koepsak boeh: <sup>12</sup> Anih a tang o haih rang hoiah Sithaw khaeah misahoihaih hoi anghnai thaihaih to a tawnh o. <sup>13</sup> To pongah nangcae pakoe ah na oh o thai hanah, nangcae han patang ka khang naah, tha na zok o han ai kang koeh o haih.

### *Muithla rang hoiah thacakhaih*

<sup>14</sup> Hae pongah aicae Angraeng Jesu Kri Ampa khaeah khokkhu ka cangkrawn, <sup>15</sup> van hoi long ah kaom imthung takoh ahmin boih loe Anih khae hoiah ni a lak o, <sup>16</sup> kalen parai a lensawkhaih baktih toengah, nangcae han hmueng ang paek o moe, angmah ih Muithla thacakhaih rang hoiah a thung ih kami to tha a caksak; <sup>17</sup> tanghaih rang hoiah nangcae palung thungah Kri oh thai hanah, amlunghaih ah ting moe,

tangzun to caksak, <sup>18</sup> kaciim kaminawk baktiah kalen, kakawk, kathuk, kasang loe tih maw, tito na panoek o thaih moe, <sup>19</sup> panoekhaih mah pha thai ai ih Kri amlunghaih to panoek pacoengah, Sithaw akoephaih boih hoi na koi o thai hanah, lawk ka thuih. <sup>20</sup> Aicae mah hnik moe, a poek o haih boih pongah kamthlai ah sah thaih Sithaw loe, a thacakhaih hoiah aicae thungah toksak baktih toengah, <sup>21</sup> Kri Jesu rang hoiah Anih hoi kricaabu khaeah dungzan khoek to tahamhoihaih om poe nasoe. Amen.

## 4

### *Muithla ah poek amhonghaih*

<sup>1</sup> Kawk ih kami ah na oh o baktih toengah, kawk ih kami hoi kamcuk ah kho na sak o hanah, Angraeng pongah thongkrah kami, Kai mah kang pacae o, <sup>2</sup> hmuen boih ah, minawk tlim ah khosakhaih, poeknaemhaih hoi palungsawkhaih to tawn oh loe, maeto hoi maeto amlunghaih hoiah khosah oh; <sup>3</sup> Muithla ah poekhaih maeto amhong thai hanah tha pathok oh. <sup>4</sup> Oephaih maeto tawnh hanah nangcae to kawk baktih toengah, takpum maeto hoi Muithla maeto ni oh; <sup>5</sup> Angraeng maeto, tanghaih maeto, tuiuemhaih maeto, <sup>6</sup> kaminawk boih ih Ampa, Sithaw maeto khue ni oh, anih loe aicae boih ranui ah oh, kami boih khaeah oh moe, nangcae boih thungah oh. <sup>7</sup> Toe Kri ih tangqum paekhaih baktih toengah, tahmenhaih loe aicae boih khaeah paek boeh. <sup>8</sup> To pongah ni Anih ranui bangah caeh



tahang naah, misong ah kaom kaminawk to a zaeh moe, kaminawk khaeah tangqum nawk to paek, tiah a thuih. <sup>9</sup> (Anih caeh tahang, tiah thuih naah, anih loe long thung ih kahnaem koek ahmuen ah anghum tathuk hmaloe, tiah doeh thuih koehhah ih na ai maw? <sup>10</sup> Anghum tathuk kami loe, hmuen boih koepsak hanah, van boih ranui koekah daw tahang kami to thuih koehhah ih ni.) <sup>11</sup> Anih mah thoemto kaminawk to patoeh ih kami, thoemto kaminawk to tahmaa, thoemto kaminawk to tamthanglok taphong kami, thoemto kaminawk to kricaa zaehoikung hoi patukkung ah paek: <sup>12</sup> kaciim kaminawk toksak akoep moe, Kri takpum a goeng o sak thai hanah, <sup>13</sup> aicae boih tanghah hoi Sithaw Capa panoekhah bangah maeto ah amhong moe, Kri akoephah tawn kami maeto ah a pha o ai karoek to om tih; <sup>14</sup> aicae loe aling thah kaminawk mah, aling thai hanah patuk ih loknawk pongah, takhi mah hmuh naah ahnuk ahmaa kangthui nawktanawk baktiah a oh o han om ai, <sup>15</sup> toe tih boih ah lu ah kaom, Kri hoi kangvan ah a goeng o thai hanah, amlunghah hoiah loktang lok thui kami ah a oh o han oh boeh: <sup>16</sup> Anih khae hoiah ni takpum boih nawnto amcong moe, kamtomh ahuhnawk boih doeh thacaksak, takpum ah kaom tanghangnawk boih mah angmacae ih tok a sak o boih baktih toengah, takpum to amlunghah bangah a goeng o sak tahang.

*Kangtha hoi kangquem hinghah*

<sup>17</sup> To pongah Angraeng rang hoiah hae tiah lok ka thuih, vaihi hoi kamtong tiah doeh angcoeng ai, Gentelnawk caehhah baktiah caeh o hma lai ah, <sup>18</sup> nihcae panoekhaih loe khoving baktiah tahmuep moe, panoekhaih tawn o ai, palung mik a maeng o pongah, Sithaw hinghaih hoiah amkhraeng o ving boeh: <sup>19</sup> nihcae loe azathaih tawn o ai, taksa koehhah bangah thacak o parai moe, long taksa koeh hmoekhaih palung tawnh o pongah, kaciim ai hmuennawk boih to a sak o. <sup>20</sup> To baktih hmuen to Kri khae hoiah nam tuk o ai; <sup>21</sup> Anih kawng to na thaih o boeh, loktang loe Jesu ah ni oh, tiah anih mah ang patuk o boeh: <sup>22</sup> canghnii ih aling koehhah palungthin hoiah kamro kangquem hinghaih to angkhring oh loe, <sup>23</sup> Muithla ah poekhaih palungthin to angtha o sak ah; <sup>24</sup> toenghaih hoi loktang ciimcaihah bangah, Sithaw ah sak ih kami kangtha to angkhuk oh. <sup>25</sup> To pongah lok amlaihaih to takhoe oh, aicae loe takpum maeto hoi kaom tanghang ah a oh o pongah, kami boih mah a imtaeng kami khaeah loktang lok to thuih han oh. <sup>26</sup> Palung na phui o, toe zaehaih sah o hmah: palung na phuihaih loe niduem hmah nasoe. <sup>27</sup> Setan hanah ahmuen pahoe pae o hmah. <sup>28</sup> Paqu kami loe paqu hma lai nasoe: toksah nasoe loe, amtang kaminawk abom hanah, kahoih hmuen to a ban hoiah sah nasoe. <sup>29</sup> Na pakha thung hoiah loksae tacawt hmah nasoe, tahngai kaminawk atho oh thai hanah, atho kaom lok to patch oh.

---

**4.22** Kol 3.9.    **4.24** Kol 3.10; Genesis 1.26.    **4.25** Zek 8.16.  
**4.26** Saam 4.4.

<sup>30</sup> Sithaw ih Kacai Muithla to palungsae o sak hmah, Anih hoiah ni akranghah ni karoek to hanah catui ang daeng o. <sup>31</sup> Hnukmahaih, poek amthuenghah, palungphuihah, hraw-anghah, loksethah hoi uthaihnawk boih to nangmacae khae hoiah takhoe o ving ah: <sup>32</sup> maeto hoi maeto nuihah tahmenhah hoi amlunghah to tawn oh, Kri ah Sithaw mah ang tahmen o baktih toengah, nangcae doeh maeto hoi maeto tahmenhah tawn oh.

## 5

### *Aanghah tok hoi vinghah tok*

<sup>1</sup> To pongah Sithaw mah palung ih caa ah na oh o baktih toengah, Sithaw hnukbang kami ah om oh; <sup>2</sup> Kri mah aicae ang palung moe, Sithaw khaeah hmuihoih ah oh hanah, angmah hoi angmah aicae angbawnhah ah angpaek boeh, to pongah nangcae doeh amlunghah hoiah khosah oh. <sup>3</sup> Kaciim kami ah na oh o boeh pongah, zae sakhah, ciimcai ai hmuen hoi kamthlai hmoek koehhahhnawk nangcae thungah oh han om ai boeh; <sup>4</sup> amhnonghah, kamthu lok apaehhah hoi tamhnui lok sakhahhnawk loe kamsoem hmuen na ai ni, to baktih hmuen sak pongah loe kawnhah lok to thui o lat ah. <sup>5</sup> Nongpa nongpata zaehah sah kami, ciimcai ai kami, kamthlai hmoek koeh kami, krang bok kam-inawk loe Kri hoi Sithaw mah siangpahrang ah uk ih prae to toep o thai mak ai, tito na panoek o. <sup>6</sup> Mi kawbaktih mah doeh avang

ai lok hoiah na ling o hmah nasoe: to baktih hmuén pongah ni lok tahngai ai kaminawk nuiah Sithaw palungphuihaih to phak. <sup>7</sup> To pongah nangcae loe nihcae hoi angkom o hmah. <sup>8</sup> Nangcae loe canghnii ah vinghaih thungah na oh o, toe vaihi loe Angraeng pongah aanghaih ah na oh o boeh: to pongah aanghaih caanawk baktiah khosah oh: <sup>9</sup> (hoihhaih, toenghaih hoi loktangnawk boih loe Muithla ih thingthai ah ni oh;) <sup>10</sup> Angraeng mah talawk thai koi hmuén to pakrong oh. <sup>11</sup> Athaih kaom ai kaving toksakhaih hoiah angkom o hmah, toe to baktih kaving toksakhaih to amtueng o sak ah. <sup>12</sup> Nihcae mah tamquta hoi sak o ih hmuénawk to lok hoi thuih han ih mataeng doeh azat thoh. <sup>13</sup> Toe to tiah kamtueng hmuénawk loe kawbaktih hmuén maw, tito aanghaih mah ni amtuengsak: hmuénawk boih amtuengsakkung loe aanghaih hae ni. <sup>14</sup> Anih mah, Aw iip kami nang anglawt lai, duekhaih thung hoi anghawk ah, to tih nahaeloe Kri mah aanghaih to na paek tih, tiah thuih. <sup>15</sup> To pongah aceohaih hoiah khosah oh, kamthu baktiah om ai ah, palungha baktiah om oh, <sup>16</sup> aninawk loe hoih ai boeh pongah, atue kahoih to paawt ah. <sup>17</sup> To pongah kamthu baktiah om o hmah, Angraeng koehhaih panoek kami ah om oh. <sup>18</sup> Mu paqui o hmah, to tiah ohhaih mah sethah to tacawtsak, to pongah Muithla hoi koi oh; <sup>19</sup> maeto hoi maeto Saam laa, pakoehhaih laa hoi Muithla laa to sah oh, palung thung hoi Angraeng khaeah laa to sah

oh; <sup>20</sup> hmuen boih ah aicae Angraeng Jesu Kri ih ahmin hoiah Pa Sithaw khaeah anghoehaih lawkthui o toepsoep ah; <sup>21</sup> Sithaw zithaih hoiah maeto hoi maeto tlim ah khosah oh.

*Imthong hoi Kricaabu*

<sup>22</sup> Zunawk, Angraeng khaeah nang paek o baktih toengah, na savanawk khaeah angpaek oh. <sup>23</sup> Kri loe kricaabu lu ah oh baktih toengah, sava loe zu ih lu ah oh: Anih loe takpum pahlongkung ah oh. <sup>24</sup> Kricaabu mah Kri khaeah angpaek baktih toengah, zunawk mah doeh hmuen boih ah angmacae sava khaeah angpaek o nasoe. <sup>25</sup> Kri mah kricaabu palung moe, hinghah paek baktih toengah, savanawk, na zu to palung oh; <sup>26</sup> Anih mah kricaabu to tui hoiah pasae ueloe, lok hoiah ciimsak tih, <sup>27</sup> coek koi kaom ai, nganhin angcu ai, to tiah coek han koi tidoeh kaom ai, lensawk kricaabu maeto ah angmah khaeah paek thai hanah, coek koi kaom ai, ciimcai kricabu ah oh han angaih. <sup>28</sup> To pongah nongpanawk mah a zunawk to angmacae ih takpum baktih toengah palung han oh. Azu palung kami loe angmah hoi angmah amlung kami ah oh. <sup>29</sup> Mi kawbaktih mah doeh angmah ih takpum to hnuma vai ai; Angraeng mah kricaabu khetzawn baktih toengah ni, a takpum to pacah moe, a khetzawn. <sup>30</sup> Aicae loe angmah ih takpum, angan, ahuh thungah kathum kami ah ni a oh o. <sup>31</sup> Hae pongah nongpa mah anno hoi ampa to caehtaak ueloe, a zu hoi

---

**5.22** Kol 3.18; 1 Pt 3.1.    **5.25** Kol 3.19; 1 Pt 3.7.    **5.31** Genesis 2.24.

nawnto om tih, to naah nihnik loe takpum maeto ah ni om hoi tih boeh. <sup>32</sup> Hae loe kalen loktamqu ah oh: toe kai loe, Kri hoi kricaabu kawng ni ka thuih. <sup>33</sup> Toe nangmacae takpum na palung o baktih toengah, na zunawk to palung o toeng ah; zu mah doeh sava to khingya han oh.

## 6

<sup>1</sup> Nawktanawk, Angraeng ah nam no hoi nam pa ih lok to tahngai oh: amno ampa lok tahn-gaihah loe katoeng hmuen ah oh. <sup>2</sup> Nam no hoi nam pa to saiqat ah; hae loe lokkamhah hmaloe koekah oh; <sup>3</sup> to tiah na sak nahaeloe khosak na hoih ueloe, long nuiah na hinglung sawk tih. <sup>4</sup> Ampanawk, na caanawk palungphui han sah hmah: Angraeng ah thuitaekhaih hoi patukhaih bangah qoeng o sak ah.

### *Tamna hoi Angraeng*

<sup>5</sup> Tamnanawk, Kri ih lok na tahngaih o baktih toengah, poekhaih amkhraeng ai ah, zithaih hoi tasoehhah hoiah taksa ah na angraeng ih lok to tahngai oh; <sup>6</sup> minawk palung tongh hanah, minawk mikhnuk ah khue sah o hmah; Kri ih tamna ah na oh o baktih toengah, Sithaw koehhah to palung thung hoiah sah oh; <sup>7</sup> kami ih toksak baktiah poek ai ah, Angraeng ih toksak baktiah, palung tang hoiah toksah oh: <sup>8</sup> tamna maw tamna ai, kami boih mah a sak o ih kahoih hmuen baktih toengah, Angraeng khae hoiah tangqum to hnu o tih, tito panoek oh.

---

6.1 Kol 3.20. 6.2 EXO 20.12; Deu 5.16. 6.4 Kol 3.21. 6.5 Kol 3.22-25.

<sup>9</sup> Angraengnawkw, na tamnanawkw khaeah to tiah sah oh, nangcae ih angraeng doeh van ah oh, tiah panoek oh loe, tamnanawkw to pazih o hmah: Anih loe kami mikhmai khethaih tawn ai.

*Sithaw ih maiphaw maica*

<sup>10</sup> Nawkamyawkw, hnukhuem koekah loe anih thacakhaih hoiah Angraeng ah thacak o sak ah. <sup>11</sup> Setan zoekhaih na pakaa o thai hanah, Sithaw ih aphawnawkw to angkhuk oh, <sup>12</sup> aicae loe taksa hoi athii kaom misa to a tuh o ai, sakthaihaih akaa katawn, ukkungnawkw, hae long vinghaih ukkungnawkw hoi kasang ahmuen ah kaom kasae muithlanawkw ni a tuk o. <sup>13</sup> To pongah Sithaw ih aphaw to angkhuk oh, to tiah ni kahoih ai ni angzoh naah na pakaa o thai ueloe, misa tuk pazawkw boih karoek to nang doe o thai tih. <sup>14</sup> To pongah loktang to kaengkaeh ah angzaeng oh loe, toenghaih to saeok padaphaih ah angkhuk oh; <sup>15</sup> taphong han paroep ih angdaehhaih tamthanglok hoih to khokpanai bum ah abuen oh, <sup>16</sup> to hmuennawkw boih pacoengah, pakaahaih ah kaom tanghaih to angkhuk oh, to tiah ni taqawkw mah kah ih hmai kamngaeh palaanawkw to na paduek o thai boih tih. <sup>17</sup> Pahlonghaih sum lumuek hoi Muithla sumpen ah kaom, Sithaw lok to angnaengh oh. <sup>18</sup> Lawkthuih hoi hnikhaih, lawkthuihaih congca hoiah Muithla ah lawkthui o toepsoep ah; lawkthuih thazok ai ah, kaciim kaminawkw boih hanah lawk to thui oh. <sup>19</sup> Tamthanglok

---

**6.9** Kol 4.1; Deu 10.17; Kol 3.25.    **6.14** Isaiah 11.5; Isaiah 59.17.  
**6.15** Isaiah 52.7.    **6.17** Isaiah 59.17.

hoih taphonghah kai khaeah ang paek baktih toengah, misahoihah hoiah pakha angh moe, kathuk tamthanglok hoih to ka thuih thai hanah, kai han doeh lawk na thui pae o toeng ah. <sup>20</sup> Ka thuih han koi lok to, misahoihah hoiah ka thuih han ih ni, kai loe sumqui hoi pathlet ih laicaeh ah ka oh.

*Boenghah lawkthuihah*

<sup>21</sup> Kai loe kawbangmaw ka oh, timaw ka sak, tito na panoek o hanah, Angraeng ah oep kathok toksah kamnaw, Tukika mah, hmuennaw boih na thui o tih: <sup>22</sup> kaicae khosakhainaw na panoek o moe, nangcae pathloep thai hanah, anih to kang patoeh. <sup>23</sup> Angraeng Jesu Kri hoi Ampa Sithaw khae ih monghah, tanghah hoi amlunghah to nawkamyaw khaeah om nasoe. <sup>24</sup> Aicae Angraeng Jesu kri palunghah tawn tangtang kaminaw boih khaeah tahmenhah om nasoe. Amen.



**Asang Khongca Bible (2019)**  
**The Holy Bible in the Asang Khongca language of**  
**Mynmar**

Public Domain

Language: Asang Khongca (Chin, Eastern Khumi)

Dialect: Asaang Khongca

Published in Mynmar, which is not a signatory to international copyright treaties. Copyright may apply locally in Mynmar. Translator names withheld for security reasons.

2020-09-24

---

PDF generated using Haiola and XeLaTeX on 21 Feb 2024 from source files dated 13 Dec 2023

48776925-bad5-5701-8cb9-5ee5267a8fab